



DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ,

Orthodoxorum Medicorum Patrono

BIU Santé  
Médecine  
Paris

QUÆSTIO MEDICA

CARDINALITIIS DISPUTATIONIBUS

*manè discutienda in Scholis Medicorum, die Martis tertiâ mensis*

*Martii, anno Domini M. DCC. LXXXIX.*

M. NATALI-NICOLAO MALLET, Doctore Medico, Præside.

*An ad sanitatem, ut corporis sic & mentis exercitatio?*

I.

UT suæ felicitatis, ita & suarum miseriarum artifex homo, Naturæ vertit in crimen quod sit incerta fallaxque valetudo, vita fluxilis, promptior lethi necessitas. Quin potius accusemus ingluviem, intemperantiam, effrena animi

*Propugnata anno 1759, Auctore M. MAUDUIT DE LA VARENNE.*



pathemata, venerem indomitam, torporemque illum quem sub otii nomine summum sibi bonum animis fingunt plurimi. Ità homini benè consuluit natura, ut illa voluerit cætera animalia ab homine non solâ rationis prællantiâ, sed etiam corporum robore superari. \* Homo namque inter animalia solus qui quadraginta per annos non cesset à laboribus variis, continuis, multiplicibus. Tanta insita est corpori ejus vis vitæ, ut nullius alius animalis tantum sit robur, quod æquè superare possit incommoda, quæ perpetuò viventibus procreant inevitabilis aëris necessitas, tempestatum vicissitudines, caloris & frigoris vices, regionum aspectus varii, varietasque alimentorum. Quacumque enim patet terra reperiuntur homines, solaque species hominum habitat ubique. Cessamus igitur ab injussis questibus, ultroque cum Quintiliano profiteamur: *frustra mala omnia ad crimen natura relegamus, nemo nisi suâ culpâ dolet.* Verùm & se ipso & iis quæ ipsum circumambiunt homo nescit uti. Imperans est, gulæ deditus; noctis dieique vices mutat, ità ordinem naturæ subvertit, ut æstate glaciem amet, hyemæ frigus cautiùs vitet. At inter rerum non naturalium crebros abusus, undè infirma hominum valetudo degenerisque humanæ speciei ruina, non ultimus numerandus, torpor five corporis five animi.

## I I.

QUANTUM ad robur & sanitatem conferat corporis exercitatio, ut innumera probant rerum experimenta, sic uno ore omnes conclamant \*. *Ignavia*, ait Celſus, *corpus hebetat, labor firmat, illa maturam senectutem, hic longam reddit adolescentiam.* \* *Chæneus* verò motûs & quietis commodam institutionem non minoris ferè ad vitam sanam momenti esse, quàm ad ipsam vitam nutrimentum, affirmat. \* *Boerrhaavius* ipse noster motum corporis ad primum usque exortum lenissimi sudoris, vel usque ad sensum incipientis lassitudinis commendat. Exindè fortasse fertur quod ipse solitum habuerit unâ quâque die equum conscendere, atque duarum circiter horarum spatio, indulgere exercitio: scilicet ut experiretur quid in robusto corpore mens sana possit exequi. Etenim illæ gentes cæteris populis & animorum & corporum viribus præstare semper, quas labor magis impiger induraverat. Quàm ingens, *referente Tacito*, Germanis olim corporum robur, quàm firma illis animorum constantia, cum libertaris amor Romanæque servitutis odium ipsos exerceret. Gentium Regina succubuit victrix Roma, postquam cives ejus otio diffluxerunt. Ipsam subvertit dura gens quam aluerat septentrio: adeò nihil non superat labor improbus. Et verò mollis est Asiaticus non solummodo quod ejus membra calor resolvat, sed insuper quod facilis pateat undiquè campus rerum omnium quæ sunt ad vitam necessariæ ex se, proprio telluris munere, absque hominum labore ferax; dùm contrariâ ex parte durus septentrionis incolæ non nisi defatigatus altos montes superat, densa penetrat nemora, gelu constrictam aratro scindit tellurem, nec nisi multo labore vitæ sustentamina sibi congerit. Sed quid opus externis? Ruricola quàm robusto corpore, quàm firmâ gaudet valetudine! Magnatibus verò quàm delicatula corporum compages, quàm obnoxia millenis morbis rustico incognitis. Meliùs antiqui quàm nos. Jure enim suo Atheniensium, Lacedæmoniorumque Legislatores Gymnasticam artem tantoperè commendabant; quin eam ipse Lycurgus sacrâ religionis autoritate confirmatam voluerat. Sed quid molior multa? Natura pueros quos amat adhuc, gremioque fovet, ut pote pueros innocuosque à contagio vitæ, perpetuò invitat ad cursus, subsultus, generis omnis motus. Ipsa inter eos choræas agitât manûque sublevat. Miserrimum nobis quòd deinceps longiùs à naturâ recedamus.

\* Vide Theſ.  
an omnium  
animalium  
homo robustiſſimus, ann.  
1710. M. de  
la Hire.

\* Lib. 1,  
cap. 1, p. 20.  
\* Cap. 4,  
§. 1.  
\* N. 1044.



**Q**UAMVIS quænam vincula corpus & animum conjungant inter se, ex quo exstiterè Philosophi, disputatum fuerit, nec dùm inventum sit ac demonstratum; nihilominus manet inconcussum, in homine præter corpus dari substantiam dissimilem à corpore, inextensam, cogitantem, animi nomine insignitam. Utriusque illius substantiæ divinitus unitæ, tale existit commercium, ut utraque agat in se reciproçè. Namque non solummodo morborum pestes mentem perturbant, sed & variæ animi affectiones varia producant in corpore symptomata. Undè ad sanitatem corporis multi refert qualem servaveris animæ statum. Nam non cogitandum aut fingendum cum quibusdam omnem animi affectionem omnino pendere à corpore; omniumque pathematum corporeas existere causas. Nihil potest assignari in corpore amorì aut odio simile. Illa non in organis, sed sunt in animâ. Et quemadmodum Logici docent calorem non inesse in igne, sed intrâ animam, sic amor aut odium insunt non in nervis variè motis, sed in mente \*. Atque ita tamen sumus instructi, ipse ait Boerhaavius, ut hæc conditio mentis, amoris aut odii excitet in corpore motus. Undè mentem in corpus agere probatur abundè, cum in corpore motus mens excitet. Sed si sit mens agens in corpus, refert quales, quantos, quàm placidos aut inordinatos in ipso motus suscitet. Nunc verò demonstrandum incumbit quòd, mens si diutius torpescerit nec longò didicerit usû suos motus moderari, impossibile esse, ut, multis in casibus, ea quæ sunt utilia, de corporis motibus statuere possit.

\* N<sup>o</sup>. 573.

## I V.

**Q**UEMADMODUM exercitio corpus induratur, sic labore mens firmatur, aptiorque evadit rerum naturas callere earumque pretium justè estimare. Exindè molestiæ quæ nos quotidie quamdiù vivimus lacescunt, hujusque humanæ nostræ conditionis indivulsæ sunt comites, cum miseria & cruciatus procreant iis hominibus quorum mens est fevior, omni proindeque muliercularum genti, sapientem feriunt impavidum. Animum verò regere quanti ad sanitatem corporis interfit, quis non videt? Verùm quis modus animum servare tranquillum adversus tanta hæc mala in scriptis Philosophorum præsidia sumendo? Quantas in corpore tragœdias excitet immoderatus animi imperus, sola satis demonstrat ira, dùm torvo lumine vultum, modò pallore, modò intenso rubore suffundens, dentibus infrendit, atque omnis generis vasorum canale coarctato angustatoque spiritum pluribus intercludit. \* Suo jure Parisiensis Scholæ Magister thesim scripsit quâ demonstrat omnes animi passiones, exceptâ moderatâ lætitiâ, sanitati nocere. Namque vel fibras laxant, harumque tonum omnino subvertunt, vel eas tendunt nimis, mortemque cum rigiditate citius inferunt omnia animi pathemata. Dicat Sanctorius ut insensibilem transpirationem turbare, mutare, sistere valeant animi affectus. Dicant Præctici quanti in morbis momenti sit placido esse animo; quot morti tradat vesanus mortis timor; quoties præjudicata opinio insanabilia reddiderit ea, quæ periculi nihil habebant. \* Digna quæ notetur historia virginis cujusdam Massiliensis, quæ, tempore quo pestis Massiliam depopulabatur, peste cum ipsa tentaretur, ad hunc pervenit morbi gradum, ex quo vitæ reddebatur nullus, unaque plura inter millia convaluit, ex eo scilicet, quòd quo instante decubuit, ipsi cum fucum facerent Medici, salubri errore delusa, alio quàm peste morbo se laborare, quamdiù duravit ipsius morbus, arbitrata est. Ipsi verò Medici undè nosocomia, pesti-

\* Anno 1731. Præside M. Preaux.

\* Traité de la Peste, pag. 276.



ferorum domos, mortis atria ingrediuntur illæsi, nisi quia mens ipsis cum sit exercitata magis, sapientior quoque & firmior est, nec ea quæ turbetur iis quæ cæteris hominibus vix sunt tolerabilia. At verò gens melancholicorum, ad quos maximè pertinet nostra propositio, uide tot miseriis cruciatur, vexaturque? Non tam in ventriculo lenta morbi tabes, non tam in obstructis visceribus, aut denso nec circulante purpureo latice recondita latet, quam in eorum vivendi genere. Maximum illis malum est otium, maxima pestis vitæ pondus & horarum. Hinc ipsis vel levissimus in vitâ eventus instar supplicii est, ægraque mens trahit insons corpus in partem magnam miseriarum. Vis citò convalescant? Aliquod negotium iis suscita, facque ità, ut ex otio disturbentur.

## V.

\* De San.  
tuend. lib. 2.

\* Réveries,  
art. de la tac.

**N**EC obijciat aliquis magnam hominum partem, agricolas nempè, omnisque generis artifices, integerrimâ gaudere sanitate absque ullâ mentis exercitatione. Ii namque homines, operibus suis dum sunt intenti, minimè sunt otiosi. Quemadmodum enim litteratis hominibus deambulare exercitium, sic rustico, vel levis animi attentio, labor est. Diversa namquæ sunt, ut corporum, sic ingeniorum, pro diversis tum ætatibus, tum conditionibus instituenda exercitii genera. Præclare igitur Galenus, \* *feri potest ut idem motus alteri sit exercitatio, alteri non sit.* Non igitur matribus nostris, magnatibusque viris, autor fuerim ut mollia frangant duris membra laboribus; ipsos sed ad jucundiora, nec minus utilia, invitaverim. Quod sibi scientiarum aut artium genus placet magis, quisque videat & quò trahit sua voluptas, sequatur. Dulce sequi quidquid placet: & tot habet rerum natura quæ placere possint. Si te juvant cantus, cantare bonum, mollesque agitare choræas. Multa potens agere in corpus nostrum musica, quæ trahit in consensum volentes nolentesque; \* cui orbis imperium, à Romanis occupatum, referre non dubitavit magnus inter multos Gallorum duces, comes Saxonius. Enim verò dum nervus auditorius, tam crebras multiplicesque ac miras in corpore jungit connexiones, quos ab aëre tremores accepit, in toto corpore diffundit, totaque intus moles agitur. Dulce quoque est errare silentibus in sylvis ubi teneros amores avium populus suspirat, aut viridem peragrarè pratum, florumque carpere odores. Nec omiserim blandam voluptatem, historiæ naturalis studium. Illo namque studii genere mens eruditur, corpusque exercetur. Utile quidquid corpus aut mentem exercet, utiliùs & mentem & corpus simul exercere. Cuicumque igitur sanitas curæ est, ille & animi & corporis, angue pejus, otium vitet.

*Ergò ad sanitatem, ut corporis sic & mentis exercitatio.*

Proponebat Parisiis, JACOBUS-JOSEPHUS AUDIRAC, Cameracensis, Eques, Doctor Medicus Mompeliensis, Societatis Regiæ Scientiarum Mompeliensis Socius, necnon Saluberrimæ Facultatis Medicinæ Parisiensis Baccalaureus.

A. R. S. H. 1789. AB OCTAVA AD MERIDIEM.



Typis QUILLAV, Universitatis & Facultatis Medicinæ Typographi. 1789.